



STINAPA TA INFORMA

'RADIO BIAHERO' DEN NATURALESA

Zamir Ayubi. E tata di tres yu i e D.J. loko loko aki stima su naturalesa boneriano. Despues di a traha na diferente radio-stashon i kanalnan di televishon na Boneiru i Aruba, el a yuda lanta Radio Digital. E 'highlight' den su karera ta e kobertura di e bishita di Reina Beatrix na 1999. Ku bista riba, entre otro, promoshon di Boneiru su naturalesa serka turistanan, e i un sosio a lanta e radio emisora 'Travelling 97.1 FM'. "Laga nos no gaña nos mes!" Zamir ta kuminsá na splika e importansha di naturalesa pa nos bida. "Nos mester di e oksígeno pa por sobrebibí komo hende." Zamir ta orguyoso ku Boneiru ta disponé hustamente di e oksígeno limpi i puru aki. Gracias na e limpiesa i preservashon. Banda di esei, e ta gosa di e diversidat di mata- i bestianan manera Kayena, Kibrahacha, Prikichi, Flamingu etc. I sin lubidá e bida bou di laman ku ta gosa di tantu popularidat rònt mundu. E parti di Boneiru ku mas Zamir gusta ta e bahada banda di Gotomeer kaminda bo tin e bista riba e islanan chikitu den e lago. Segun Zamir, e bahada di solo na e sitio aki ta úniko. Lac tambe ta gosa di su simpatia konsiderando e pal'i mangelnan i otro matanan. Zamir ta boga fuertemente pa laga nos naturalesa boneriano mas outéntiko i úniko posibel. Pues no pensa mes di buta un Disneyland na Gotomeer por ehèmpel. "E promé kara di un pais ta su naturalesa. Pues, e promé bista di e turista ora e yega Boneiru ta nos naturalesa!" Pesei mes Zamir ta enfatisá e importansha di naturalesa pa nos ekonomia. Zamir ta roga nos tur pa nos tur huntu komo suidadero ku ta biba riba e presioso baranka ku yama Boneiru pa uni komo ser humano. Segun Zamir, asina nos lo forma huntu forsa. Di e manera aki nos por kuida i konservá nos naturalesa pa turista i nos mes por gosa di e naturalesa, den e sentido mas amplio di palabra. I di tur lokual Boneiru tin di ofresé i ku ta kalifiké komo úniko, tantu riba tera komo bou di awa. "Laga nos realisá e simpleza pero alabes e bunitesa di e palabra di 10 lèter aki", e ta konkluí ku un sonrisa. *Skirbí pa Natalie Wanga, tradusí pa marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru